



Violénsia Bazeia ba Jéneru no Violénsia Seksuál relasiona ho Teknolojia Dijital: Dezafiu no Oportunidade ba Polisiamentu iha Timor-Leste

Relatóriu husi

Fundasaun Mahein

Dezemburu 2024



www.fundasaunmahein.org

Konteúdu

Akrónimu.....	1
Sumáriu Ezekutívu.....	2
Introdusaun.....	2
Metodolojia	3
Ligasaun Entre Teknolojia Dijital ho GBSV iha Timor-Leste	4
Rezultadu.....	4
Lakuna Bo'ot iha PNTL nia Kapasidade atu Responde ba GBSV Dijital	4
Xefe VPU	5
Observasaun husi membru PNTL sira seluk	6
Perspetiva husi Organizasaun Sociedade Sivil	7
ALFeLa	7
FOKUPERS	8
Judicial System Monitoring Program	9
Análize: Dezafiu no Oportunidade sira ba PNTL	10
GBSV Dijital – Kestaun Poder no Impunidade	12
Rekomendasaun.....	14
Konkluzau.....	15
Referénsia	17

Akrónimu

ALFeLa	Assisténsia Legal ba Feto no Labarik
FM	Fundasaun Mahein
FOKUPERS	Forum Komunikasi Perempuan Timor-Lorosa'e
GBV	Violénsia Bazeia ba Jéneru
GBSV	Violénsia Bazeia ba Jéneru no Violénsia Seksuál
JSMP	Judicial System Monitoring Program
MSSI	Ministériu Solidariedade Sosial no Inklusaun
ONG	Organizasaun naun-governmental
OSS	Organizasaun sociedade civil
PCIC	Polísia Científica no Investigaçáo Criminal
PNTL	Polísia Nacional Timor-Leste
SEI	Sekretariado Estado ba Igualdade
VPU	Unidade Ema Vulnerável

Sumáriu Ezekutívu

Relatóriu ida ne'e apresenta rezultadu peskiza ne'ebé ezamina impaktu husi internet no teknolojia dijitál ba iha violénsia bazeia ba jéneru no seksuál (GBSV) hasoru feto no labarik sira iha Timor-Leste. Fundasaun Mahein (FM) mak hala'o peskiza ne'e ho objetivu atu fó rekomendasaun ba Polísia Nasionál Timor-Leste (PNTL) hodi haforsa sira nia resposta ba problema ne'e liu husi aprosimasaun polísia komunitária.

Peskiza ne'e envolve koleasaun dados primáriu liu husi entrevista semi-estruturadu ho grupu prinsipál rua: ofisiál PNTL sira, inklui Unidade Ema Vulnerável (VPU), no organizasaun sosiedade sivíl (OSS) tolu ne'ebé servisu hodi apoia ema ne'ebé sofre husi GBSV: ALFeLa, FOKUPERS no JSMP.

Rezultadu husi peskiza ne'e hatudu katak GBSV iha Timor-Leste sai kompleksu liu iha era dijitál, liu-liu relasiona ho asédiu, esplorasau no abuzu seksuál liu husi internet. Fatór seluk maka Timor-Leste nia kontekstu iha ne'ebé maioria falta literasia dijitál, no mos iha ne'ebé GBSV mosu tanba relasaun podér entre feto no mane ne'ebé la igual no norma sosio-kultural ne'ebé normaliza violénsia. Peskiza ida ne'e deskobre, maske VPU hatudu ona nia vontade hodi kombat GBSV, PNTL sei falta rekursu finanseiru, umanu no teknolojia. Nune'e mos, PNTL nia formasaun dijitál seidak adekuaudu no PNTL enfrenta obstákulu estruktural esterna ne'ebé difikulta sira nia servisu. Organizasaun sosiedade sivíl sira ne'ebé servisu iha área prevensaun GBSV no apoiu vítima sira subliña nesesidade atu hametin koordensaun entre instituisaun polisiamentu ho servisu apoiu komunitáriu sira hodi responde ba GBSV nia dimensaun dijitál.

Ikus liu, relatóriu ne'e oferese rekomendasaun balun ho objetivu atu responde ba dezafiu GBSV dijitál iha Timor-Leste, ezemplu hanesan tenke investe iha kapasidade institusional no operasional PNTL nian, hametin parseria entre sosiedade sivíl, polísia no governu, no inkorpora asuntu literasia dijitál ba iha estratéjia polisiamentu komunitáriu nian.

Introdusaun

Kestaun GBSV kontinua sai preokupasaun bo'ot iha Timor-Leste, liu-liu ba feto no labarik sira.¹ Baibain, inisiativa sira relasiona ho GBSV foka liu ba kestaun abuzu fíziku no psikolójiku. Maibé, dadaun ne'e ema barak liu bele asesu ba internét liu husi telemóvel (*smartphone*), tablet no plataforma média sosial. Teknologia refere fasilita ona tipu abuzu, esplorasau no violénsia foun ne'ebé bolu "GBSV dijitál". Iha tempu hanesan, populasaun Timor-Leste nia literasia dijitál sei limitadu tebes, inklui koñesimentu kona-ba riksu no konsekuénsia husi abuzu no asédiu seksuál liu husi

¹ Peskiza hatudu ona katak 1/3 to'o 1/2 husi feto no labarik sira iha Timor-Leste esperiénsia ona GBSV. Pur ezemplu, The Asia Foundation nia relatóriu Nabilan (2016) ka relatóriu Spotlight Initiative (2021) kona-ba GBV iha Timor-Leste.

internet ka “*online*”.² Tanba fatór hirak-ne'e, prátika sira hanesan asédiu *online*, *cyberstalking* no esplorasau dijital aumenta ba beibeik.³ Ida ne'e sai dezafiu bo'ot tebes ba instituisaun polisiamentu sira no organizaun sosiedade sivil sira ne'ebé servisu hodi apoia vítima no sobrevivente GBSV sira.

Peskiza ida ne'e responde ba dezafiu ida ne'e liu husi avaliasaun situaun atuál relaciona ho GBSV *online* ka dijital iha Timor-Leste, husi perspectiva PNTL nian, liu-liu VPU, no mos organizaun sosiedade sivil sira ne'ebé servisu iha área prevensaun no apoiu GBSV nian. Aleinde ne'e ami tenta atu identifika lakuna koñesimentu, rekursu no koordenaun entre parte xave sira, ho objetivu atu fó rekomendasaun konkreta hodi haforsa sosiedade sivil no polisia sira nia abilidade atu responde ba dezafiu ida ne'e.

Metodolojia

FM hala'o koleaun dados primáriu liu husi entrevista semi-estruturadu ho grupu prinsipál rua: ofisiál PNTL sira ne'ebé bazeia iha Dili, liu-liu VPU, no organizaun sosiedade sivil sira ne'ebé servisu ho vítima GBSV sira. FM rekolla dados sekundáriu sira liu husi revizaun dokumentu relevante sira, inklui relatóriu ajénsia internasionál sira, artigu notísia sira no ONG sira nia website. Ekipa peskiza Fundasaun Mahein mak hala'o análise dados no sintesis.

Entrevista semi-estruturadu sira-ne'e fó flexibilidade atu bele diskute respondente ida-idak nia esperiênsia no perspectiva, no mos ajuda ami atu foka ba iha tópiku prinsipál sira. Entrevista hirak ne'e fornese dados kualitativu kona-ba dezafiu institucionál no operasionál sira ne'ebé PNTL no parte sira seluk enfrenta bainhira sira responde ba GBSV dijital.

Tanba limitaun tempu no finanseiru, peskiza ne'e la buka perspectiva ema ne'ebé esperiênsia ona GBSV dijital, ou membru família ka membru comunidade sira seluk. Tanba ne'e, peskiza sira ne'e só refleita de'it perspectiva ka hanoin individu no organizaun sira ne'ebé servisu iha área GBSV, la'ós perspectiva sobrevivente ka vítima GBSV sira nian.

Estudu ne'e refere ba “GBSV *online*” no mos ba “GBSV dijital”.⁴ Termu sira ne'e deskreve atividade sira ne'ebé akontese *online* hanesan *cyberstalking*, *cyberbullying* ka fahe imajen seksuál sein konsentimentu. Maibé termu ne'e bele mos deskreve aktu fíziku sira ne'ebé mediadu ka fasilita liu husi teknolojia komunikaun dijital sira, hanesan bainhira ema ruma utiliza média sosiál atu hasoru malu ho ema seluk, depois nia komete abuzu seksuál.

² Hare'e UNCDF nia relatóriu kona-ba literasia dijital no finanseiru iha Timor-Leste (2023).

³ Hare'e The Asia Foundation nia relatóriu Digital Youth in Timor-Leste (2022).

⁴ UN Women ho ajénsia UN sira seluk uza termu ida “Technology-Facilitated Gender-based Violence” (TFGBV); maibé, FM deside atu uza fali GBSV dijital ka GBSV *online* tanba termu ne'e seidaun konesidu iha Timor-Leste.

Ligasaun Entre Teknolojia Dijital ho GBSV iha Timor-Leste

Teknolojia komunikaun dijital - liu-liu telemovel ne'ebé baratu no pakote internet - transforma ona relasaun sosial iha Timor-Leste. Ne'e inklui iha área urbanu sira hanesan Dili iha ne'ebé bele asesu ba internet fasil liu, maibé mós inklui área rural sira ne'ebé liga ona ba rede 4G nian. Maske internet fó oportunidade foun atu halo komunikaun no asesu ba informasaun, internet mos lori risku hanesan abuzu *online*. Feto no labarik feto sira sai nu'udar vítima prinsipal ba asediu *online*, *cyberstalking* no fahe imajen intimu sein konsentimentu. Aleinde ne'e, iha ona evidénsia ne'ebé hatudu katak ema barak utiliza meius komunikaun *online* atu komete abuzu no violénsia seksuál kontra ema seluk.

Timor-Leste foin tama iha prosesu transformasaun ba mundu teknolojia dijital nian, maibé ita bele antisipa katak bainhira asesu ba internet ho velocidade a'as aumenta, GBSV dijital sei kontinua aumenta. Ida ne'e sai dezafiu bo'ot sira ba instituisaun polisiamentu sira atu bele kompriende no responde ba tipu no meius abuzu, esplorasau no asédiu sira ne'e. Métodu polisiamentu tradisionál ne'ebé dala barak reativu no responde de'it ba insidente violénsia física, sei la adekua atu responde ba GBSV dijital ne'ebé dala barak la envolve aktu físiku.

Tanba ne'e Fundasaun Mahein fiar katak PNTL, liu-liu VPU, tenke dezenvolve estratejia foun atu kombate abuzu *online* no abuzu ka violénsia sira ne'ebé mediadu liu husi komunikaun dijital. Tenke dezenvolve kapasidade institusionál atu deteta no prevene prátika hirak ne'e, inklui téknika investigasaun dijital, programa sensibilizasaun komunitária no koordinasaun entre PNTL nia unidade especializada – VPU no Divizaun Jéneru – no mos ho estrutura polisiamentu komunitáriu no munisipal sira. Iha tempu hanesan, PNTL tenke kolabora ho organizasaun sosiedade sivil no entidade governu sira hanesan Ministériu Solidariedade Sosial no Inklusaun (MSSI) no Sekretariadu Estado Igualdade (SEI) hodi responde ba GBSV dijital, no mos ba fatór sosial sira ne'ebé facilita violénsia hasoru feto no labarik sira.

Rezultadu

Lakuna Bo'ot iha PNTL nia Kapasidade atu Responde ba GBSV Dijital

Rezultadu tuir mai ne'e sumariza entrevista ne'ebé FM hala'o ho ofisial PNTL balun, inklui xefe VPU atuál. Entrevista sira ne'e diskute ofisial sira nia preokupasaun relasiona ho teknolojia dijital ho GBSV, no mos diskute asaun espesífiku sira ne'ebé VPU foti hodi responde ba dezafiu ida ne'e. Ofisial sira nota katak plataforma dijital sira lori dezafiu foun, maibé PNTL ho VPU hasoru obstákulu barak atu responde ho efetivu, inklui kapasidade tékniku ne'ebé limitadu, rekursu umanu ne'ebé la suficiente no estigma sosio-kultural relasiona ho violénsia seksuál ne'ebé prevene vítima sira

atu hato'o keixa, liu-liu bainhira kazu envolve diferença podér bo'ot entre arguidu no vítima.

Xefe VPU

Husi perspetiva xefe VPU, utilizaun teknolojia dijitál ne'ebé aumenta, liu-liu internét, iha implikasaun bo'ot ba seguransa juventude nian iha Timor-Leste. Internet ho velocidade a'as no pakote dados movel ne'ebé baratu liu, tanba ne'e utilizaun telemóvel no plataforma *online* sai atrativu liu. Maibé, ema barak, liu-liu joven sira, seidauk kompriende didi'ak kona-ba risku sira ne'ebé asosiadu ho teknolojia hirak ne'e. VPU observa katak kazu barak rejistu ona relasiona ho atividade *online*, no ema barak uza telemovel sira iha maneira ne'ebé la kontroladu, nune'e sira loke sira nia an ba risku.

Preokupasaun boot ida-ne'ebé xefe VPU hatu'o mak asesu ba pornografia, liu-liu ba labarik sira. Dala barak inan-aman sira fó telemovel ba sira nia oan tanba hakarak fasilita edukasaun, hanesan aprende lian Inglés. Maske nune'e, inan-aman barak la monitor sira nia oan sira, tanba ne'e sira bele hetan informasaun ne'ebé la di'ak, inklui pornografia. Iha tempu hanesan, labarik barak envolve iha "sexting" (haruka mensajen ho karakter seksuál) no fahe imajen seksual ho sira nia kolega sira. Kazu hirak ne'e la'ós de'it envolve adultu ne'ebé explora ka viola labarik - VPU mos haree ona kazu barak iha ne'ebé labarik abuza labarik seluk ho maneira ne'e.

Atu responde ba preokupasaun sira ne'e, VPU halo ona programa ho joven sira, liu-liu iha eskola, kona-ba utilizaun média sosiál ho seguru. VPU nia programa sosializasaun hanorin joven sira kona-ba *cyberbullying*, asédiu no exploraun seksuál *online*. VPU rekoñese katak asesu internet nia aspetu pozitivu barak, hanesan hasai koñesimentu kona-ba tópicu oi-oin. Maibé VPU mos afirma katak presiza kuidadu no kompriende kona-ba internet nia risku. VPU nia programa ne'e hahú koalia ho estudante eskola sekundária sira, atu hala'o diskusaun kona-ba violénsia bazeia ba jéneru, exploraun seksuál no risku atu fahe informasaun no imajen pesoál *online*.

VPU subliña katak Kódigu Penál Timor-Leste seidauk rekoñese fahe imajen sira sein konsentimentu nu'udar krime. Labarik feto joven sira vulneravel liu atu fahe imajen pesoál sira iha plataforma média sosiál sira, ne'ebé sira la bele kontrola depois hamosu exploraun ka abuzu. Tanba seidauk iha provizaun legál espesífiku kona-ba asunto ida-ne'e, PNTL nia kapasidade atu halo asaun apropiadu iha kazu sira hanesan ne'e sei limitadu.

Xefe VPU mos hatu'o katak presiza haforsa kolaborasaun no fahe informasaun entre entidade relevante hotu-hotu atu respondee ba kestaun ne'e. VPU rekomenda aprosimasaun sosiál ne'ebé abranjente liu atu proteje joven feto no labarik feto sira. Ida ne'e signifika setór sociedade oin-oin tenke servisu hamutuk atu prevene ema sai vítima abuzu liu husi teknolojia dijitál sira, inklui família, comunidade, ajénsia governu lokál no nasionál sira, sociedade sivil, organizaun komunitária, instituisaun edukasaun no instituisaun polísia sira.

Ikus liu, xefe VPU subliña importánsia edukasaun no koñesimentu hodi responde ba dezafiu ne'e. Presiza eduka individu sira kona-ba oinsá atu uza teknolojia sira ne'e ho responsabilidade no rekoñese nia risku sira. VPU rekoñese katak organizasaun sociedade sivil sira iha papél importante atu hasa'e konsiénsia comunidade nian no fornese informasaun hodi ajuda individu no família sira uza teknolojia dijitál sira ho seguru.

Observasaun husi membru PNTL sira seluk

Tuir membru PNTL sira seluk ne'ebé halo entrevista ho FM, situasaun atuál kona-ba violénsia seksuál dijitál no violénsia bazeia ba jéneru sai preokupasaun bo'ot. Númeru insidente aumenta ba beibeik ne'ebé envolve vítima sira ne'ebé identifika liu husi média sosiál. Maibé, vítima sira dala barak sente moe atu hato'o relatóriu kona-ba insidente. Estigma relasiona ho violénsia seksuál, liu-liu iha kazu sira ne'ebé arguidu sira mak ema ho podér, prevene vítima barak atu hato'o keixa. Hanesan ofisiál ida esplika, "Iha ona kazu barak, maibé ema barak sente moe, no sira lakohi mai atu hato'o keixa." Bainhira vítima sira nono'ok ne'e limita PNTL nia kapasidade atu rezolve problema. Kazu seluk, keixa iha ona, maibé kazu la la'o ba oin tanba investigadór sira falta rekursu ka koñesimentu atu konstrui kazu ne'ebé forte. Kazu balun PNTL haruka ona ba Ministériu Públiku, to'o ikus kazu paradu tanba evidénsia la suficiente ka laiha prosedimentu atu kontinua. Ofisiál ida hato'o katak, iha kazu barak, "tanba seidak iha lei ne'ebé espesífiku ba asuntu ida ne'e, prokuradór la bele kontinua kazu ne'e."

Relasiona ho comunidade nia koñesimentu kona-ba asuntu ne'e, ofisiál ida esplika katak maske iha konsiénsia jerál balun kona-ba risku plataforma dijitál sira, inan-aman no membru comunidade barak la foti medida proativu atu eduka sira nia oan: "Ema barak hatene kona-ba problema ne'e, maibé sira lakohi fó hatene sira nia oan. Depois, kuandu oan sai vítima, sira hakfodak." Falta edukasaun ne'e halo joven sira vulnerável, liu-liu iha área rurál ka remota sira ne'ebé ho literasia dijitál menus. Iha área sira hanesan ne'e, vítima sira dala barak la hatene kona-ba konseitu sira hanesan bosok ka esplorasau liu-husi plataforma *online*.

PNTL nia kapasidade atu responde ba krime dijitál ne'e mos hetan impaktu husi limitasaun tékniku no rekursu umanu. Bainhira ema hato'o keixa, ofisiál sira buka arguidu, maibé dala barak susar atu hetan nia. Maibé, la iha esplikasaun klaru tanba sa mak ida ne'e susar iha kazu sira ne'ebé PNTL hatena ona autór nia naran, hanesan bainhira autór uza perfíl média sosiál hodi komete asediu seksuál ka abuzu ruma.

PNTL halo ona esforsu atu hasa'e koñesimentu públiku kona-ba GBSV dijitál no risku sira husi teknolojia dijitál, hanesan kampaña odamatan ba odamatan no programa informasaun iha eskola sira, no mos fahe informasaun liu husi média sosiál, televizaun no rádiu. Maibé, impaktu husi atividade hirak ne'e limitadu tanba falta pesoál no rekursu. Tanba kampaña hirak ne'e limitadu, comunidade barak, liuliu iha área rurál sira, seidak hetan informasaun kona-ba risku sira ne'ebé asosiadu ho teknolojia dijitál.

Tuir membru PNTL sira, rekursu ne'ebé presiza liu mak kapasidade IT no instrumentu dijitál sira atu deteta no responde ba krime sibernétiku (cybercrimes). Membru ida ható'o katak "PNTL falta kapasidade atu uza sistema dijitál ne'ebé avansadu hodi deteta krime sibernétiku ne'ebé sofistikadu" sai hanesan obstákulu boot ida ba polisiamentu. Karik PNTL la iha infraestrutura teknolojia ne'ebé presiza, PNTL sei la bele responde ba ameasa ne'ebé aumenta ba beibeik husi GBSV dijitál. Membru ida seluk fó avizu dehan "Governu tenke responsabiliza atu rezolve problema hirak ne'e, se lae bainhira kabu fibra optika funsiona ona, vítima sei barak liu tan no PNTL-VPU sei la bele halo buat ida."

Perspetiva husi Organizasaun Sosiedade Sivíl

OSS sira nia papél importante hodi suporta vítima no sobrevivente GBSV sira, inklui fornese apoiu psiko-sosial no asisténsia legál, no halo advokasia kona-ba lejislasaun ho objetivu atu garante katak autór GBSV enfrenta justisa no mos atu proteje vítima sira. Entrevista ho OSS tolu ne'ebé halo prestasaun apoiu psiko-sosial no asesu ba justisa ba vítima GBSV hatudu katak OSS sira hasoru ona kazu abuzu *online* ka mediadu liu husi teknolojia dijitál. OSS sira subliña nesesidade ne'ebé aumenta programa literasia dijitál atu eduka vítima no mos polísia sira kona-ba perigu GBSV dijitál no oinsá atu responde ho efetivu.

ALFeLa

ALFeLa (Asisténsia Legál ba Feto no Labarik)⁵ suporta feto no labarik sira ne'ebé esperiénsia ona GBSV hodi asesu ba sistema justisa formál liu-husi asisténsia legál, edukasaun no advokasia.

Durante ne'e ALFeLa observa ona kazu abuzu seksuál ne'ebé aumenta liu husi média sosiál sira, liu-liu Facebook. Pur ezemplu, autór barak ameasa atu fahe vítima nia imajen privadu bainhira vítima lakohi ona halo relasaun. ALFeLa konsidera ida ne'e hanesan taktika ida ne'ebé mane barak sira uza atu kontrola vítima feto sira. Tipu abuzu ida ne'e aumenta ba beibeik, no kada fulan ALFeLa observa kazu balun. ALFeLa mós relata katak labarik feto sira hetan manipulasaun liu husi internet depois tama iha situasaun sira ne'ebé hamosu violasaun grave.

Ohin loron, joven barak utiliza média sosiál atu namora malu, nune'e sira la uza ona dalan tradisionál atu koñese malu, hanesan liu husi kolega ka família seluk. Tuir ALFeLa, ida ne'e parese kontribui ba kazu abuzu ne'ebé aumenta. ALFeLa mos observa katak joven sira dala barak monu lalais bainhira koalia ba malu liu husi média sosiál, no sira la kompriende risku bainhira hasoru ema *online*. Ida ne'e akontese liu-liu ba labarik-feto joven sira ne'ebé vulneravel liu ba manipulasaun no esplorasau, liu-liu bainhira sira fahe ona imajen privada sira. Situasaun sai komplikadu liu tanba joven barak falta koñesimentu kona-ba risku husi interasaun *online* no falta literasia dijitál.

⁵ <https://iwda.org.au/asistensia-legal-ba-feto-no-labarik/>

ALFeLa nota katak Rede Referal, ne'ebé inklui VPU no organizasaun sosiedade sivil sira seluk, servisu ho laran metin atu responde ba kazu no ajuda vítima sira. ALFeLa mos ajuda halibur evidénsia husi ekipamentu dijitál sira, ne'ebé sira fornese ba VPU atu halo investigasaun. Maske nune'e, organizasaun sira nia kapasidade sei limitadu atu responde ba kazu hotu-hotu ho efetivu, no ALFeLa nota katak sira la hare'e kazu barak tanba vítima sira la hatene kona-ba ALFeLa ka moe atu lori kazu.

Atu bele responde ba situasaun ne'e, ALFeLa rekomenda tenke halo esforsu bo'ot liu atu hasa'e koñesimentu iha eskola no comunidade sira kona-ba risku média sosiál sira, liuliu bainhira koalia ka hasoru ema foun *online*, ou namora ka halo relasaun seksuál *online*. ALFeLa sujere mos atu aumenta formasaun média sosiál ne'ebé governu fo ba jornalista sira atu kobre tópiku sira hanesan seguransa média sosiál, abuzu no asédiu seksuál, atu nune'e bele ajuda prevene kazu GBSV dijitál sira iha futuro.

FOKUPERS

FOKUPERS (Forum Komunikasi Perempuan Timor-Lorosa'e)⁶ nu'udar ONG direitu fetu nian ida ne'ebé halo advokasia ba igualdade jéneru no fornese servisu apoiu ba fetu sira ne'ebé hetan esperiénsia GBSV.

Durante entrevista ho FM, FOKUPERS nota impaktu negativu bo'ot husi média sosiál ne'ebé uza sala, liu-liu ba fetu no labarik-fetu vulnerável sira ne'ebé dala barak la kompriende didi'ak risku bainhira fahe informasaun pesoál *online*. *Cyberbullying* no aseéiu seksuál *online* aumenta liu tan, no vítima barak mak hetan abuzu no estereotipu bainhira sira fahe sira nia informasaun privadu. Vítima sira dala barak hasoru asédiu adisionál iha forma abuzu verbal, *online* no *offline*. FOKUPERS nota katak vítima barak lakohi hatu'o keixa, tanba ta'uk ema sei fó sala sira ka trata sira la di'ak.

Tuir FOKUPERS, kultura patriarkál ne'ebé metin iha Timor-Leste sai nu'udar fatór boot ida iha femonénu GBSV dijitál. FOKUPERS afirma katak hahalok aat hanesan cyberbullying ka asédiu ne'ebé mai maioria husi mane sira, ema barak konsidera hanesan buat ne'ebé “normal” ka “mane nia natureza atu goza fetu”. Ida ne'e tau todan ba fetu sira tanba fetu mak tenke “responsável” atu la bele sai vítima. Hahú kedas husi idade ki'ik, labarik fetu sira aprende atu kuidadu-an no hela iha uma, no ida ne'e promove ambiente ida ne'ebé fetu sira tenke foti responsabilide ba mane sira nia hahalok. Aleinde ne'e, problema ekonomia no kiak obriga fetu barak atu simu abuzu hanesan buat ne'ebé normál iha sira nia moris.

Maske estadu atinje ona progresu balun atu kombate violénsia bazeia ba jéneru, hanesan kriminalizasaun violénsia doméstika, sei iha lakuna bo'ot, liu-liu iha relasiona ho abuzu dijitál ka *online*. FOKUPERS subliña katak organizasaun sosiedade sivil sira nia papél importante atu eduka comunidade sira kona-ba risku husi média sosiál no

⁶ <https://www.fokupers.org/>

mos suporta vítima sira. Maske nune'e, sira rekoñese katak estadu iha responsabilidade másimu atu fó apoiu no protesaun ne'ebé adekua ba vítima sira.

FOKUPERS husu ba governu atu foti pozisaun ida ne'ebé forte liu hasoru violénsia bazeia ba jéneru, inklui asédiu no abuzu *online*, liu husi fornese rekursu nesesáriu sira hodi monitoriza kazu no fó kastigu ba autór sira. FOKUPERS mos rekomenda katak estadu tenke fó apoiu ativu liu ba organizasaun sosiedade sivíl sira ne'ebé servisu iha área ne'e, no mos inkorpora asuntu sekuransa dijital no asédiu seksuál iha programa edukasaun komunitária sira.

Judicial System Monitoring Program

ONG advokasia legál JSMP (Programa Monitorizasaun Sistema Judisiária)⁷ hala'o monitorizasaun no advokasia kona-ba sistema judisiária no reforma legál iha Timor-Leste, ho foku maka'as ba igualdade jéneru no GBSV. JSMP mos servisu hamutuk ho ONG sira seluk hodi fó apoiu ba feto sira ne'ebé sai vítima ba GBSV.

Kona-ba kestaun GBSV dijital, JSMP relata kona-ba utilizaun média sosiál ne'ebé la apropiadu, liu-liu mane sira ne'ebé uza plataforma hirak ne'e atu intimida ka kontrola sira nia parseiru. Dala barak ne'e envolve manipulasaun emocionál, ameasa no asédiu, ne'ebé limita vítima nia liberdade, no halo vítima ta'uk atu sai husi nia uma. Hahalok refere dala barak envolve ema foin sa'e ka joven, tanba barak uza komunikaun *online* nu'udar meus kontaktu prinsipál, dala barak tanba família kontrola feto nune'e la bele hasoru malu beibeik. Maibé sempre komunika liu husi media sosiál ne'e bele hamosu laran-moras (*keceburuan*), to'o ikus violénsia física bele mosu tanba la fiar malu.

Fatór xave sira ne'ebé hamosu abuzu dijital mak dependénsia ekonómika no falta koñesimentu. JSMP nota katak arguidu barak la hatene katak hahalok *online* bele lori konsekuénsia legál. Nune'e mos, feto sira ne'ebé hetan abuzu, liu-liu bainhira depende ba osan husi la'en, dala barak lakohi lori kazu tanba tauk no mos la fiar katak sistema legál bele rezolve.

JSMP hare'e katak sistema justisa iha Timor-Leste seidak impoin pena ne'ebé todan liu relasiona ho kazu abuzu seksuál no violénsia doméstika. Dala barak juiz sira suspende pena, inklui kazu ne'ebé vítima espera katak arguidu sei tama prizaun. Protesaun ba vítima durante prosesu tribunál sei menus. Ida ne'e hafraku fali sistema justisa tanba halo vítima sira seluk lakohi lori kazu ba oin. JSMP mos mensiona katak Timor-Leste seidak iha mekanizmu ida atu bele kontaktu diretamente kompañia média sosiál sira hodi prevene konteudu aat espalla *online*, hanesan eziste iha nasaun sira seluk.

JSMP rekomenda tenke muda lei atu rezolve lakuna sira iha Kódigu Penál relasiona ho GBSV, liu-liu tenke inklui incestu nu'udar krime. JSMP mos husu governu atu halo formasaun espesializadu ba polisia no prokuradór sira hodi investiga kazu GBSV

⁷ <https://jsmp.tl/>

dijitál sira. Nune'e mos, JSMP afirma katak Governu Timor-Leste, liu-liu MSSl no SEI, presiza ativu liu iha prosesu hasa'e comunidade sira nia konsiênsia no fó apoiu ba vítima sira ba tempu naruk. Ikus liu, JSMP husu doador sira la bele konsentra de'it ba programa sensibilizasaun ba tempu badak, maibé tenke investe fali ba iha iniciativa ba tempu naruk atu responde ba abut abuzu teknolojia dijitál relasiona ho GBSV iha Timor-Leste.

Análize: Dezafiu no Oportunidade sira ba PNTL

Lakuna iha Formasaun, Rekursu no Enkuadramentu Lejizlativu

Rezultadu husi entrevista sira ho ofisiál PNTL no organizasaun sosiedade sivíl sira identifika lakuna bo'ot relasiona ho formasaun no rekursu sira iha PNTL nia VPU nia laran. Dezafiu bo'ot seluk maka koñesimentu ne'ebé limitadu iha comunidade sira kona-ba risku husi teknolojia dijitál. Maske PNTL nia unidade espesializada sira iha ona knaar no esperiênsia atu responde ba GBSV, maibé sira falta espesialidade téknika no instrumentu ne'ebé nesesáriu atu investiga no responde ho efetivu ba kazu abuzu ne'ebé akontese *online*. Sein formasaun espesializada kona-ba forense dijitál no krime sibernétiku (digital forensics and cybercrime), susar ba PNTL atu responde ba GBSV dijitál, tanba ne'e vítima sai vulneravel liu no autór sira sei la hasoru justisa.

Dezafiu bo'ot ida ne'ebé identifika durante entrevista sira ho organizasaun sosiedade sivíl no ofisiál PNTL sira mak lakuna lejislativa iha lei kriminál Timor-Leste nian relasiona ho asédiu no abuzu *online*. Maske iha ona lei ne'ebé kriminaliza GBSV fízika, seidak iha enkuadramentu legál ne'ebé define GBSV dijitál ka *online*, ka fó matadalan ba prosesu investigasaun no prokurasau kazu sira ne'e. Tanba seidak iha lei ka matadalan, PNTL falta instrumentu no koñesimentu atu responde didi'ak ba kazu sira ne'ebé envolve asediu ka abuzu *online*. Kazu refere komplikadu tebes tanba bele envolve kolesaun evidênsia dijitál no kooperasaun ho kompañia média sosiál sira. Lakuna lejislativa ida ne'e impede maka'as PNTL no prokurador nia kapasidade atu responde ho efetivu ba abuzu dijitál, tanba ne'e autór barak sira la sofre konsekuênsia legál ruma.

Oportunidade ba Kolaborasaun

Maske iha dezafiu barak, iha mos oportunidade ba PNTL atu hametin nia resposta ba GBSV *online* liu husi kolaborasaun ho organizasaun sosiedade sivíl no entidade governu sira hanesan SEI. Bainhira servisu hamutuk, entidade sira ne'e bele desenvolve estratéjia prevensaun ne'ebé abranjente atu responde ba GBSV nia aspeitu fíziku no dijitál. Estratéjia ne'e bele envolve programa formasaun conjunta ba polísia no lider komunitáriu sira, kampaña informasaun públika conjunta kona-ba literasia dijitál no seguransa *online*, no kria protokolu ne'ebé klaru atu hatu'o keixa no no investiga kazu abuzu *online*.

Nesesidade bo'ot ida ne'ebé mak identifika iha entrevista sira mak falta formasaun no kapasidade atu prosesa kazu dijitál GBSV sira. Tanba ne'e, esensiál atu implementa programa kolaborativa ida ne'ebé foka liu ba kapasitasaun ofisiál PNTL, prokuradór no autoridade judisiáriu sira seluk. Ida ne'e bele envolve semináriu no sesaun formasaun ne'ebé lidera husi organizasaun sosiedade sivíl sira ho espesializasaun iha seguransa dijitál, enkuadramentu legál no violénsia bazeia ba jéneru. Sesaun hirak ne'e nia objetivu mak atu hanorin atór prinsipál sira iha sistema justisa kona-ba situasaun atuál relasiona ho GBSV dijitál, no fó koñesimentu relasiona ho halibur no jere evidénsia dijitál sira.

Aleinde ne'e, estadu bele servisu hamutuk ho parseiru rejionál ka internasionál sira ne'ebé iha esperiénsia avansadu relasiona ho forense dijitál, atu nune'e bele ajuda dezenvolve PNTL nia kapasidade atu investiga no prosesa kazu GBSV dijitál sira.

Relasiona ho númeru kazu GBSV dijitál ne'ebé sa'e, sosiedade sivíl no PNTL subliña importánsia atu hasa'e comunidade nia konsiénsia kona-ba seguransa dijitál, liu-liu feto vulnerável no labarik sira. Atu atinje ida ne'e presiza kampaña conjunta sensibilizasaun públika ida atu eduka públiku kona-ba risku husi média sosiál, oinsá atu proteje informasaun pesoál, no oinsá atu hatu'o relatóriu kona-ba asédiu ka abuzu *online*. Kampaña ida-ne'e bele hala'o liu husi fahe informasaun direita ba comunidade, programa rádiu, televizaun no média sosiál.

Presiza mos kolaborasaun entre governu, sosiedade sivíl no PNTL atu garante distribuísiaun informasaun ne'e ba públiku tomak. Meius ne'ebé bele efektivu mak programa sensibilizasaun iha eskola sira, ne'ebé fahe matéria edukasaun hamutuk ho Ministériu Edukasaun, Ministériu Solidariedade Sosiál no Inkluziun, no ONG sira ne'ebé foka ba kestaun jéneru. Bele mos hala'o semináriu ba inan-aman sira atu hasa'e koñesimentu, atu nune'e inan-aman sira bele hanorin sira nia oan atu bele uza teknolojia dijitál sira ho seguru.

Hare'e ba lakuna legál sira ne'ebé identifika iha leten, presiza esforsu kolaborativu ida atu dezenvolve enkuadramentu legál ida ne'ebé abranjente hodi responde ba GBSV dijitál. Atu atinje ida ne'e, presiza kria grupu traballu kompostu husi entidade relevante sira hanesan Ministeriu Justisa, PNTL, MSSI, ONG sira ne'ebé servisu iha área jéneru no justisa, no peritu tékniku sira iha área direitu dijitál. Grupu traballu sei servisu hamutuk hodi elabora lei ida kona-ba GBSV dijitál ne'ebé refleita realidade ambiente Timor-Leste, responde ba nesiedade vítima sira-nian no hametin instituisaun justisa nia kapasidade atu implementa. Enkuadramentu legál ida ne'e sei fornese definisaun legál klaru kona-ba asédiu no abuzu *online*, estabelese prosesu sira atu halibur no prezerva evidénsia dijitál no protokolu sira ba polísia no prokurador bainhira investiga no prosesa kazu sira ne'e.

Governu hamutuk ho parseiru internasionál sira bele dezenvolve plataforma ida ne'ebé seguru hodi fasilita vítima sira atu hatu'o relatóriu konfidensiál kona-ba asédiu ka abuzu *online*. Presiza ekipa dedikadu ida iha PNTL atu monitoriza plataforma ne'e, no ekipa presiza formasaun kona-ba prosesamentu kazu GBSV dijitál sira hodi

garante katak PNTL responde lalais ba insidente sira bainhira simu keixa. Plataforma ne'e bele mos fasilita asesu ba apoiu legál atu ajuda vítima sira asesu ba sistema justisa kriminál, asesu ba asisténsia psikolójika, no ajuda hasai dados pesoál husi plataforma *online*. Servisu refere bele fornese liu husi Rede Referral GBV ne'ebé eziste ona.

Area importante seluk ne'ebé presiza kolaborasaun mak peskiza no koleasaun dados relasiona ho GBSV dijitál. Organizasaun sosiedade sivíl sira, hamutuk ho instituisaun akadémika no estadu, bele hala'o estudu hodi kompriende di'ak liu tan prevalénsia, lala'ok no impaktu husi GBSV dijitál iha Timor-Leste. Peskiza ne'e sei fornese dados kona-ba situasaun atuál relasiona ho GBSV dijitál, atu nune'e bele informa desizaun polítika no programa sira. Peskiza bele foka ba autór no vítima GBSV dijitál sira, hodi investiga abut problema ne'e no nia fatór kontributivu sira. Bele mos halo peskiza atu avalia efikásia programa sira ne'ebé implementa ona, hanesan VPU nia programa sosializasaun iha eskola no comunidade sira kona-ba seguransa *online*. Rezultadu husi peskiza ne'e bele kontribui ba dezeñu programa ne'ebé inovativu liu hodi hasa'e konsiénsia kona-ba risku komunikasaun *online* entre foin-sa'e sira.

Nune'e mos, presiza kria grupu kolaborativu ida hodi monitoriza no analiza plataforma *online* sira hanesan Facebook ba ameasa potenciál ba asediu ka esplorasau. Ida ne'e bele envolve grupu traballu ida ho representante sira hosi PNTL, sosiedade sivíl no peritu teknolojia sira atu halo monitorizasaun no responde ba hahalok *online* ne'ebé la apropiadu ka ameasa ema nia vida.

GBSV Dijital – Kestaun Poder no Impunidade

GBSV dijitál iha Timor-Leste la'os de'it kestaun téknika hanesan literasia dijitál, edukasaun, lakuna legál ka kapasidade teknolojia iha PNTL. Maske fatór hirak ne'e importante tebes, ne'e parte de'it husi problema. Husi FM nia perspetiva, fatór prinsipál ne'ebé halo GBSV dijitál sai problema bo'ot iha Timor-Leste mak dinámika poder no norma patriarkál ne'ebé dezempodera feto sira, no mos normaliza ka ignora hahalok ne'ebé la apropiadu husi mane sira, liuliu mane sira ho pozisaun sosiál ne'ebé aas.⁸

Komentáriu husi membru PNTL mensiona ida ne'e, hanesan ofisiál ida mensiona katak kazu sira ne'ebé envolve “ema boot” dala barak falla tanba “evidénsia laiha”. Membru nia observasaun ne'e hamosu pergunta ne'ebé kle'an: kazu sira ne'e la la'o tanba laiha duni evidénsia ka tanba falta vontade polítika atu kaer ema sira ne'ebé iha poder? Parese, susar ba PNTL no Ministériu Públiku atu lori kazu hasoru líder bo'ot sira, tanba sira tauk problema polítiku ka instituisional. Observasaun ida ne'e refleita tema ida-ne'ebé Fundasaun Mahein sempre diskute kona-ba impunidade elite, iha ne'ebé sira ne'ebé ka'er poder polítiku no ekonómiku livre husi konsekuénsia bainhira

⁸ Peskiza internasionál relasiona ho igualdade jéneru no violénsia seksual hatudu ona ligasaun entre relasaun poder ne'ebé la igual ho insidente abuzu no esplorasau seksual (Kearns et al. 2020; Kreft 2023). Violénsia seksual akontese barak liu iha situasaun iha ne'ebé relasaun entre feto no mane la igual no la iha fleksibilidade (Kalra and Bhugra 2023).

halo aktu kriminál, liu-liu kazu sira ne'ebé envolve asédiu ka abuzu seksuál no vítima la iha podér atu koalía.

Nune'e mós, FOKUPERS ho JSMP identifika norma kulturál patriarkál nu'udar fatór prinsipál ne'ebé fasilita violénsia bazeia ba jéneru, tantu *online* no *offline*. FOKUPERS afirma katak norma hirak ne'e kria ambiente kulturál ida ne'ebé sempre fó sala ba vítima sira. Bainhira feto sira mak tenke responsável bainhira mane halo abuzu, ne'e haforsa relasaun podér ne'ebé la igual no normaliza fali abuzu. JSMP hatutan tan dehan katak feto barak sei depende ba sira nia la'en nia osan, nune'e susar ba sira atu hato'o keixa ka buka justisa tanba sira ta'uk konsekuénsia sosiál no finanseira.

Iha kontekstu ida-ne'e, ita bele konsidera GBSV dijitál hanesan parte husi norma sira ne'ebé eziste ona no balansu podér ne'ebé la igual entre "ema bo'ot" no "ema baibain" maibé mós entre mane no feto sira. Situasaun ne'e permite mane barak atu evita responsabilidade bainhira sira komete abuzu ruma. Prezensa teknolojia dijitál aumenta tan problema ida ne'e, tanba autór abuzu iha ona instrumentu foun atu explora vítima sira ho anónimu ka husi distansia. Bainhira ema bele aproveita plataforma dijitál atu halo asediu, bosok, ka manipula ema seluk sein konsekuénsia imediata, ida ne'e favorese ba autór sira, liu-liu autór ne'ebé iha influénsia ka podér ne'ebé bo'ot liu vítima nian.

Nune'e mos, fatór hirak ne'e ligadu ho atitude sosiál kona-ba violénsia doméstika no asédiu seksuál iha sociedade Timor-Leste. Iha kazu barak, abuzu seksuál no violénsia doméstika konsidera hanesan asuntu ne'ebé la grave, no ema prefere atu rezolve "iha uma laran".⁹ Ema barak prefere atu la bele lori kestaun sira ne'e ba sistema justisa formál ka públiku atu rezolve.¹⁰ Hanesan membru PNTL ida hato'o, inan-aman barak hatene bainhira sira-nia oan sai vítima, maibé sira prefere atu "taka" problema duké hato'o ba autoridade estado. Bainhira sociedade obriga vítima nonok no trata asuntu sira ne'e "iha uma laran", ne'e refleita norma sosio-kulturál ne'ebé dala barak fó prioridade ba família no armonia sosiál duké buka justisa ba vítima sira. Atitude hirak ne'e la'ós de'it ba populasaun jerál maibé eziste mos iha instituisaun estado, no situasaun ne'e hafraku resposta institusionál relasiona ba problema GBSV, dijitál ka naun-dijitál.

Situasaun ne'e kompleksu tebes, tanba ne'e estado no sociedade nia estratejia kontra GBSV dijitál la bele hare'e de'it kestaun tékniku sira. Importante nafatin atu hasa'e PNTL nia kapasidade no hametin literasia dijitál iha comunidade sira, maibé medida hirak ne'e sei la suficiente karik sira falla atu konsidera no muda estrutura podér no norma kulturál sira ne'ebé fasilita impunidade no halo vítima sira nonok. Ho liafuan seluk, entidade relevante sira tenke investe iha kompriensaun ne'ebé kle'an liu kona-

⁹ Hare'e peskiza husi Cummins (2018) no FOKUPERS (2022) kona-ba implementasaun lei kontra violénsia doméstika iha Timor-Leste, ne'ebé nota katak maioria sociedade Timor-Leste kontinua fiar katak mane bele baku nia fe'en iha kazu ruma.

¹⁰ Kovar (2012).

ba kompleksidade relasaun podér ne'ebé influénsia GBSV dijitál, atu nune'e bele dezeña intervensaun ne'ebé efetivu no sustentável.

Tanba ne'e FM rekomenda tebes ba parseiru internasionál Timor-Leste nian atu aloka rekursu hodi hala'o peskiza kle'an kona-ba dinámika podér nian ne'ebé influénsia situaun GBSV dijitál nian, no mos influénsia ba estadu no sociedade sivil nia resposta ba fenomenu refere. Peskiza ida ne'e tenke envolve organizaun sociedade sivil independente sira, liu-liu sira ne'ebé iha esperiénsia kona-ba asuntu jéneru, justisa, teknolojia no direitu dijitál, tanba entidade sira ne'e iha ona koñesimentu no sensibilidade ne'ebé nesesáriu atu investiga tópicu kompleksu ne'e. Análize podér (Power Analysis) ne'ebé kle'an lidera husi organizaun sociedade sivil sei ajuda identifika fatór xave sira no sujere oinsá bele foti asaun ne'ebé efetivu. Karik ita la halo estudu ne'e, programa sira atu responde ba GBSV dijitál sei hare'e nia sintoma de'it duké nia kauza, no ikus liu ita sei falla atu proteje grupu vulneravel sira. Tanba ne'e, presiza dezentolve aprosimasaun estratéjiku ida bazeia ba peskiza kle'an, ne'ebé inkorpora peritu téknika no mos analiza dinámika podér. Nune'e, parseiru sira bele tenta atu redús problema GBSV dijitál ne'ebé aumenta ba beibeik iha Timor-Leste.

Rekomendasaun

Bazeia ba rezultadu peskiza, FM rekomenda asaun xave sira hanesan tuir mai:

1. **Programa formasaun konjunta kona-ba forense dijitál, relatóriu kazu no GBSV dijitál:** Implementa formasaun kolaborativu ba ofisiál PNTL sira, autoridade judisiáriu no lider komunitáriu sira atu haforsa kapasidade relasiona ho investigaun no prosedimentu kazu GBSV dijitál sira. Programa ne'e bele foka liu ba oinsá atu halibur no jere evidénsia dijitál, hakerek relatóriu kazu ho kualidade, enkuadramentu legál no situaun atuál iha mundu relasiona ho GBSV dijitál.
2. **Kampanha konjunta sensibilizasaun públika:** SEI, PNTL no organizaun sociedade sivil sira bele implementa kampanha sensibilizasaun públiku ida ne'ebé foka liu ba literasia dijitál no seguransa *online* ho fokus spesífiku ba GBSV dijitál. Kampanha ne'e bele implementa direita iha comunidade no eskola sira, no mos uza rádiu, televizaun no média sosiál, atu nune'e eduka públiku kona-ba risku *online* no prátika dijitál ne'ebé seguru.
3. **Dezentolve enkuadramentu legal ba GBSV dijitál:** Governu tenke kria grupu traballu ida kompostu husi Ministeriu Justisa, MSSI/SEI, PNTL, organizaun sociedade sivil no peritu direitu dijitál sira atu elabora lejislasaun kona-ba GBSV dijitál. Enkuadramentu legál ne'e tenke define klaru abuzu *online* no abuzu ne'ebé mediadu liu husi teknolojia dijitál, atu nune'e identifika tipu oi-oin esplorasun no violénsia seksuál ne'ebé akontese *online* no *offline*. Enkuadramentu ne'e tenke mos estabelese protokolu kona-ba tratamentu evidénsia dijitál sira no esplika prosedimentu investigaun no prosesamentu kazu. Ida ne'e inklui kontrola metin oinsá PNTL no PCIC rekolla no rai dadus

vítima sira nian durante investigasaun sira. Lei mós tenke ezije instituisaun públiku no privadu hotu-hotu atu adopta polítika ba protesasaun labarik no GBSV dijitál atu aseguira katak funsionáriu públiku no privadu hotu-hotu kompriende didiak kona-ba prátika hirak ne'e.

4. **Atualiza Kódigu Penal:** Momentu Kódigu Penal Timor-Leste dezeña, teknolojia hanesan média sosiál ho *smartphone* seidauk eziste. Tanba ne'e, tenke atualiza Kódigu Penal atu identifika abuzu seksuál *online*, violénsia no esplorasau no abuzu seksuál ne'ebé fasilita husi teknolojia komunikaun dijitál nu'udar krime públiku.
5. **Kria plataforma ida atu fasilita vítima hato'o keixa ho seguru:** Estadu ho doador sira bele dezenvolve plataforma dijitál ida atu fasilita vítima sira hato'o sira nia keixa ho konfidensiál no seguru. Plataforma ne'e bele mos liga vítima sira ba apoiu legál, assisténsia psikolójiku no ajuda vítima hasai konteúdu privadu ne'ebé públika *online*.
6. **Kolaborasaun kona-ba forense dijitál:** Haforsa PNTL ho PCIC nia kapasidade iha área forense dijitál (digital forensics) liu husi parseria ho peritu internasionál sira. Kolaborasaun ne'e bele fornese assisténsia técnica no kapasitasaun kona-ba oinsá atu investiga no prosesa kazu GBSV dijitál sira.
7. **Peskiza kle'an kona-ba fatór ne'ebé influénsia dinamika GBSV dijitál:** Tenke aloka rekursu sira atu hala'o peskiza abranjente kona-ba dinámika poder no norma kulturál sira ne'ebé influénsia GBSV dijitál, no mos influénsia sociedade nia resposta ba prátika refere. Peskiza ida-ne'e tenke lidera husi organizaun sociedade sivil independente sira ne'ebé iha esperiénsia kona-ba jéneru, justisa, governasaun no direitu dijitál. Peskiza sei foka liu ba kapasidade institusionál, relasaun jéneru, impunidade elite, no kultura ne'ebé fó sala ba vítima sira no halo ema barak prefere atu la lori kazu. Tenke kompriende asuntu estrutural sira ne'e ho kle'an liu atu dezeña intervensaun sira ne'ebé efetivu no sustentável, atu nune'e proteje grupu vulnerável sira.
8. **Kria konsellu ida atu monitór GBSV dijitál:** Estabelese konsellu ida ne'ebé kompostu husi PNTL, sociedade sivil no peritu teknolojia dijitál sira atu monitoriza plataforma *online* sira no halo dokumentasaun kona-ba asédiu ka esplorasau seksuál. Ekipa ida ne'e sei halo monitorizasaun ba hahalok abuzu *online* no hato'o relatóriu ba autoridade relevante sira. Ekipa bele mos dezenvolve no koordena kampaña edukasaun sira hodi hasa'e konsiénsia kona-ba abuzu *online* no liga vítima ho rekursu no apoiu.

Konkluzau

Peskiza ida ne'e diskute kona-ba asuntu GBSV dijitál ne'ebé aumenta ba beibeik iha Timor-Leste, liu-liu kona-ba impaktu sosiál husi teknolojia dijitál sira, kapasidade setór justisa no polisiamentu atu responde, no oinsá estrutura sosiál no legál tenke

responde ba dezafiu ne'e. Liu husi entrevista ho PNTL-VPU no organizasaun sosiedade sivíl sira, peskiza ne'e identifika katak númeru kazu asediu no abuzu *online* continua aumenta no afeita ona feto no labarik feto barak. Relatóriu mos diskute kona-ba lakuna lejizlativa ne'ebé afeita ba kapasidade iha instituisaun polisiamentu no justisa atu responde ho efetivu ba dezafiu ida ne'e.

Peskiza ne'e dokumenta norma sosiál no dinámika poder sira ne'ebé komplika problema GBSV dijitál ne'e, tanba influénsia insidente GBSV dijitál no mos influénsia resposta sosiál no institusionál ba problema ne'e. Prátika no atitude sosiu-kultural sira hanesan relasaun jéneru ne'ebé la igual, fó sala ba vítima, no lakohi informa autoridade kona-ba abuzu, hamosu situasaun iha ne'ebé autór abuzu barak la hasoru konsekuénsia ruma, liu-liu autór sira ne'ebé iha influénsia sosiál ka polítika. Peskiza ne'e subliña katak GBSV dijitál refleita dezigualdade sosiál ne'ebé eziste ona, no aumenta liu tan tanba ema uza teknolojia atu esplora no hanehan ema ne'ebé marjinalizadu ona.

Atu parte interesada sira bele responde ba problema ida ne'e ho efetivu liu, peskiza ne'e rekomenda aprosimasaun estratéjiku no koordinadu ida ne'ebé envolve kolaborasaun forte entre Governu, PNTL, organizasaun sosiedade sivíl, no peritu legál no teknolojia. Tenke implementa medida sira hanesan kapasitasaun ba polisia no prokurador, revizaun ba Kódigu Penal atu responde ba GBSV dijitál, no kampaña sensibilizasaun públiku ne'ebé foka liu ba literasia dijitál no seguransa *online*. Importante mos atu dezafia estrutura poder ne'ebé la igual nian no norma kulturál ne'ebé facilita abuzu no halo vítima nonook, atu garante katak intervensaun sira responde ba problema nia abut, la'os de'it ba ninia sintoma sira. Ikus liu, presiza dezenolve resposta ida ne'ebé abranjente no informadu atu proteje grupu vulnerável sira no promove justisa iha espasu dijitál no mos fíziku.

Referência

Almeida e Silva, Ana Luzia. 'Gender-Based Violence and the Law: An Assessment of Laws, Policies and Practices Affecting Gender Equality and Gender Justice in Timor-Leste'. Dili, Timor-Leste: Spotlight Initiative, 2021.

https://www.undp.org/sites/g/files/zskgke326/files/2024-08/spotlight_genderjusticereport_full_en.pdf.

Cummins, Deborah. 'Consent, *Estraga Feto* & Decision-Making Agency in Timor-Leste'. *Diálogos* 3 (2018): 215–35.

FOKUPERS. 'Implementation of the Law Against Domestic Violence in Timor-Leste Twelve Years On'. Dili, Timor-Leste: FOKUPERS, 2022.

<https://drive.google.com/file/d/1OExuHvR93IOK4BOsmetPuV1GAj3mEz6e/view>.

Kalra, Gurvinder, and Dinesh Bhugra. 'Sexual Violence against Women: Understanding Cross-Cultural Intersections'. *Indian Journal of Psychiatry* 55, no. 3 (September 2013): 244. <https://doi.org/10.4103/0019-5545.117139>.

Kearns, Megan C., Ashley Schappell D'Inverno, and Dennis E. Reidy. 'The Association Between Gender Inequality and Sexual Violence in the U.S.' *American Journal of Preventive Medicine* 58, no. 1 (1 January 2020): 12–20.

<https://doi.org/10.1016/j.amepre.2019.08.035>.

Kovar, Annika. 'Approaches to Domestic Violence against Women in Timor-Leste: A Review and Critique'. *Human Rights Education in Asia Pacific* 3 (2012): 207–52.

Kreft, Anne-Kathrin. "'This Patriarchal, Machista and Unequal Culture of Ours": Obstacles to Confronting Conflict-Related Sexual Violence'. *Social Politics: International Studies in Gender, State & Society* 30, no. 2 (16 June 2023): 654–77. <https://doi.org/10.1093/sp/jxac018>.

The Asia Foundation. 'Digital Youth in Timor-Leste'. Dili, Timor-Leste: The Asia Foundation, 2022. https://asiafoundation.org/wp-content/uploads/2022/09/Digital-Youth-in-Timor-Leste_EN.pdf.

———. 'Understanding Violence against Women and Children in Timor-Leste: Findings from the Nabilan Baseline Study – Main Report'. Dili, Timor-Leste: The Asia Foundation, 2016. https://asiafoundation.org/wp-content/uploads/2017/06/nabilan-main-report-screen-2017_06_08.pdf.

UNCDF. 'Assessing Digital and Financial Literacy in Timor-Leste'. Dili, Timor-Leste: UNCDF, 2023. <https://www.uncdf.org/article/8606/assessing-digital-and-financial-literacy-in-timor-leste-a-survey-on-knowledge-skills-and-access>.